

Zaj no hais txog txhua leej huv tibi tsi hais cov neeg Yudais lossis lwm haivneeg. Vajtswv yog sawvdaws tus Tswv, thiab yog tus foom koobhmoov npluamias rau txhua tus uas thov nws.

Zaj no muaj raws li tej lus uas sau cia rau hauv Vajtswv phau ntawv hais li no hais tias, txhua leej uas thov tus Tswv pab puavleej yuav dim.

Tiamsis yog lawv tsi ntseeg tus Tswv, lawv yuav ua li cas thov nws? Yog lawv tsi tau hnov nws zaj, lawv yuav ua li ntseeg nws? Yog tsi muaj neeg qhia nws zaj, lawv yuav ua li cas tau hnov?

Yog Vajtswv tsi txib neeg mus yuav ua li cas muaj neeg qhia? Muaj lus sau cia rau hauv Vajtswv phau ntawv hais tias, sawvdaws zoo siab kawg li thaum tej tub xa xov coj Txojmoo zoo tuaj qhia (Loo 10:1-15)

Yexus hais rau Yexus cov thwjtim hais tias, cov nplej uas zoo hlais lawm muaj ntau kawg, tiamsis cov neeg hlais muaj tsawg.

Nej cia li thov tus tswv teb kom nws txib dua ib co neeg mus pab hlais nws cov nplej. (Mathais 9:37-38)

Yexus txav los ze lawv, nws hais rau lawv hais tias, Vajtswv twb tsa kuv ua tus kav tagnrho ib puas tsav yam lawm, tsi hais saum qaum ntuj los yog, hauv ntiajteb los yog.

Yog li ntawd, nej cia li tawm mus qhia txhua haivneeg hauv qabntuj no kom lawv los ua kuv cov thwjtim. Thaum nej muab lawv ua kevcai raus dej nej yuav tsum tuav Leejtxiv, Leejtub thiab tus Ntsujplig lub npe.

Thiab qhia kom lawv paub coj raws li ib puas tsav yam uas kuv twb qhia rau nej lawm. Kuv yuav niajnub nrog nej nyob mus txog hnuv ntiajteb kawg. (Mathais 28:18-20)

383

MUAB IB FEEM KAUM RAU VAJTSWV

Koj yuav tsum tso siab plhuav rau tus TSWV kawg koj lub siab, lub ntsws tsi txhob cia siab rau koj tej tswvyim.

Koj cia li muab tej qoobloo zoo kawg nkaws uas koj khwv tau pub rau tus TSWV, uas yog Vajtswv, tus TSWV thiaj yuav tau ntsejmuag.

Yog koj ua li no, koj yuav muaj qoobloo puv txhab puv phawv, thiab muaj cawv txiv hmab npluamias tsi muaj hub yuav ntim tas. (Pajlug 3:5,9-10)

Nej yuav tsum nqa tej uas nej muaj, ib feem kaum tuaj tso rau hauv lub Tuamtsev thiaj li yuav muaj tej qhov txhiachaw noj npluamias nyob hauv. Nej sim ua raws li kuv hais saib, nej yeej yuav pom kuv qhib roojntug Ceebtsheej, nchuav koobhmoov ntau npluamias los rau nej. (Malakis 3:10)